

四庫全書

子部

欽定四庫全書

子部

二程子抄釋卷十九

詳校官中書_臣金應琦

侍讀_臣孫球覆勘

覆校官編修_臣潘曾起

校對官中書_臣李維瀛

謄錄監生_臣胡宗高

欽定四庫全書

二程子抄釋卷九

明 呂柟 編

論王伯之辨第一

明道文
下同

臣伏謂得天理之正極人倫之至者堯舜之道也用其
私心依仁義之偏者霸者之事也王道如砥本乎人情
出乎禮義若履大路而行無所回曲霸者崎嶇反側於
曲徑之中而卒不可與入堯舜之道故誠心而王則王

矣假之而霸則霸矣二者其道不同則在擇審其初而已易所謂差若毫釐謬以千里者其初不可不審也故治天下者必先立其志王志先立則邪說不能移異端不能惑故力進於道而莫之禦也苟以霸者之心而求王道之成是銜石以為玉也故仲尼之徒無道桓文之事而曾西恥比管仲者義所不由也況下於霸者哉陛下躬堯舜之資處堯舜之位必以堯舜之心自任然後為能充其道漢唐之君有可稱者論其人則非先王之

學考其時則皆駁雜之政乃以一曲之見幸致小康其
創法垂統非可繼於後世者皆不足為也然行仁政而
不素講其具使其道大明而後行則或出或入終莫有
所至也夫事有大小有先後察其小忽其大先其所後
後其所先皆不可以適治且志不可慢時不可失惟陛
下稽先聖之言察人事之理知堯舜之道備於已反身
而誠之推之以及四海擇同心一德之臣與之共成天
下之務書所謂尹躬暨湯咸有一德又曰一哉王心言

致一而後可以有為也古者三公不必備惟其人誠以謂不得其人而居之則不若闕之之愈也蓋小人之事君子所不能同豈聖賢之事而庸人可參之哉欲為聖賢之事而使庸人參之則其命亂矣既任君子之謀而又入小人之議則聰明不專而志意惑矣今將救千古深錮之弊為生民長久之計非夫聽覽之明盡正邪之辯致一而不二能勝之乎或謂人君舉動不可不謹易於更張則為害大矣臣獨以為不然所謂更張者顧理

所當耳其動皆稽古質義而行則為謹莫大焉豈若因循苟簡卒致敗亂者自古以來何常有師聖人之言法先王之治將大有為而反成禍患者乎願陛下奮天錫之勇智體乾剛而獨斷沛然不疑則萬世幸甚

熙寧二年時為

監察御史裏行釋論王伯之分甚明白矣則行王道甚簡易矣

論遣張載按獄第二

臣伏聞著作佐郎張載往明州推勘苗振公事竊謂載經術德義久為士人師法近侍之臣以其學行論薦故

得召對蒙陛下親加延問屢形天獎中外翕然知陛下
崇尚儒學優禮賢俊為善之人孰不知勸今朝廷必欲
究觀其學業詳試其器能則事固有繫教化之本原干
政治之大體者儻使之講求議論則足以盡其所至夫
推按詔獄非謂儒者之不當為臣今所論者朝廷待士
之道爾蓋試之以治獄雖足以見其鈎深練覈之能攻
摘斷擊之用正可試諸能吏非所以盡儒者之事業徒
使四方之人謂朝廷以儒術賢業進之以獄吏之事試

之則抱道修潔之士益難自進矣於朝廷尊賢取士之

體將有所失伏乞朝廷別賜選差貴全事體

熙寧二年閏十一月

上時為監察御史裏行 釋按獄狀非獨為張載實為朝廷也

論君道第三

臣伏謂君道之大在乎稽古正學明善惡之歸辨忠邪之分曉然趣道之正故在乎君志先定君志定而天下之治成矣所謂定志者一心誠意擇善而固執之也夫義理不先盡則多聽而易惑志意不先定則守善而或

移惟在以聖人之訓為必當從先王之治為必可法不為後世駁雜之政所牽制

一作滯

不為流俗因循之論所

遷惑自知極於明信道極於篤任賢勿貳去邪勿疑必期致世如三代之隆而後已也然天下之事患常生於忽微而志亦戒乎漸習是故古之人君雖出入從容閒燕必有誦訓箴諫之臣左右前後無非正人所以成其德業伏願陛下禮命老成儒賢不必榮以職事俾日親便座講論道義以輔聖德又擇天下賢俊使得陪侍法

從朝夕延見開陳善道講磨治體以廣聞聽如是則聖
智益明王猷允塞矣今四海靡靡日入偷薄末俗嘒嘒
無復廉恥蓋亦朝廷尊德樂道一作義之風未孚而篤誠

忠厚之教尚鬱也惟陛下稽聖人之訓法先王之治一

一作正心誠意體剛健而力行之則天下幸甚釋君志定便可通天

下之志

論十事第四

臣竊謂聖人創法皆本諸人情極乎物理雖二帝三王

不無隨時因革踵事增損之制然至乎為治之大原牧
民之要道則前聖後聖豈不同條而共貫哉蓋無古今
無治亂如生民之理有窮則聖王之法可改後世能盡
其道則大治或用其偏則小康此歷代彰灼著明之効
也苟或徒知泥古而不能施之於今姑欲修名而遂廢
其實此則陋儒之見何足以論治道哉然儻謂今人之
情皆已異於古先王之迹不可復於今超便目前不務
高遠則亦恐非大有為之論而未足以濟當今之極弊

也謂如衣服飲食宮室器用之類苟便於今而有法度者豈亦遽當改革哉惟其天理之不可易人所賴以生非有古今之異聖人之所必為者固可槩舉然行之有先後用之有緩速若夫裁成運動周旋曲當則在朝廷講求設施如何耳古者自天子達於庶人必須師友以成就其德業故舜禹文武之聖亦皆有所從學今師傅之職不修友臣之義未著所以尊德樂善之風未成於天下此非有古今之異者也王者必奉天建官故天地

四時之職歷二帝三王未之或改所以百度修而萬化理也至唐猶僅存其畧當其治時尚得紀綱小正今官秩淆亂職業廢弛太平之治所以未至亦非有古今之異也天生烝民立之君使司牧之必制其常產使之厚生則經界不可不正井地不可不均此為治之大本也唐尚能有口分授田之制今則蕩然無法富者跨州縣而莫之止貧者流離餓殍而莫之恤幸民雖多而衣食不足者蓋無紀極生齒日益繁而不為之制則衣食日

感轉死日多此乃治亂之機也豈可不漸圖其制之道哉此亦非有古今之異者也古者政教始乎鄉里其法起於比閭族黨州鄉鄰遂以相聯屬統治民相安而親睦刑法鮮犯廉恥易格此亦人情之所自然行之則効亦非有古今之異也庠序之教先王所以明人倫化成天下今師學廢而道德不一鄉射亡而禮義不興貢士不本於鄉里而行實不修秀民不養於學校而人材多廢此較然之事亦非有古今之異者也古者府史胥

徒受祿公上而兵農未始判也今驕兵耗匱國力亦已竭極矣臣謂禁衛之外不漸歸之於農則將貽深慮府史胥徒之役毒遍天下不更其制則未免大患此亦至明之理非有古今之異者也古者民必有九年之食無三年之食者以為國非其國臣觀天下耕之者少食之者衆地力不盡人功不勤雖富室強宗鮮有餘積況其貧弱者乎或一州一縣有年歲之凶即盜賊縱橫飢羸滿路如不幸有方三二千里之災或連年之歉則未知

朝廷以何道處之則其患不可勝言矣豈可曰昔何以不至是因以幸為可恃也哉固宜漸從古制均田務農公私交為儲粟之法以為之備此亦無古今之異者也古者四民各有常職而農者十居八九故衣食易給而民無所苦困今京師浮民數逾百萬游手不可貲度觀其窮蹙辛苦孤貧疾病變詐巧偽以自求生而常不足以生日益歲滋久將若何事已窮極非聖人能變而通之則無以免患豈可謂無可奈何而已哉此在酌古變

今均多恤寡漸為之業以救之耳此亦非有古今之異者也聖人奉天理物之道在乎六府六府之任治於五官山虞澤衡各有常禁故萬物阜豐而財用不乏今五官不修六府不治用之無節取之不時豈惟物失其性林木所資天下皆已童赭斧斤焚蕩尚且侵尋不禁而川澤漁獵之繁暴殄天物亦已耗竭則將若之何此乃窮弊之極矣惟修虞衡之職使將養之則有變通長久之勢此亦非有古今之異者也古者冠婚喪祭車服器

用等差分別莫敢踰僭故財用易給而民有常心今禮制未修奢靡相尚卿大夫之家莫能中禮而商販之類或踰王公禮制不足以檢飭人情名數不足以旌別貴賤既無定分則奸詐攘奪人人求厭其欲而後已豈有止息者哉此爭亂之道也則先王之法豈得不講求而損益哉此亦非有古今之異者也此十者特其端緒耳臣特論其大端以為三代之法有必可施行之驗如其綱條度數施為注措之道則審行之必也稽之經訓而

合施之人情而宜此曉然之定理豈徒若迂疎無用之

說哉惟聖明裁擇

釋此十事豈止在宋無古今之異乎

論養賢劄子第五

臣竊以議當代者皆知得賢則天下治而未知所以致賢之道也是雖衆論紛然未極其要朝廷亦以行之為艱而不為也三代養賢必本於學而德化行焉治道出焉本朝踵循唐舊而館閣清選止為文字之職名實未正欲招賢養材以輔時贊化將何從而致之也臣厯觀

古先哲王所以虛已求治何嘗不盡天下之才以成已之德也故曰大舜有大焉善與人同樂取于人以為善今天下之大豈為乏賢而朝廷無養賢之地以容徐察其器識高下而進退之也臣今欲乞朝廷設延英院以待四方之賢凡公論推薦及巖穴之賢必招致優禮視品給俸而不可遽進以官止以應詔命名凡有政治則委之詳定凡有典禮則使之討論經畫得以奏陳而治亂得以講究也俾羣居切磨日盡其材行其志使政府

及近侍之臣互與相接陛下時賜召對詔以治道可觀其識才器能也察以累歲人品益分然後使賢者就位能者任職或委付郡縣或師表士儒其德業尤異漸進以師臣職司之任為輔弼為公卿無施之不稱也若是則引彙並進野無遺賢陛下尊賢待士之心可謂無負於天下矣取進止

釋只將已有之賢肯用之其治亦過半矣况養乎

答橫渠先生定性書第六

承教諭以定性未能不動猶累於外物此賢者慮之熟

矣尚何俟小子之言然嘗思之矣敢貢其說於左右所
謂定者動亦定靜亦定無將迎無內外苟以外物為外
牽已而從之是以已性為有內外也且以性為隨物於
外則當其在外時何者為在內是有意於絕外誘而不
知性之無內外也既以內外為二本則又烏可遽語定
哉夫天地之常以其心普萬物而無心聖人之常以其
情順萬事而無情故君子之學莫若廓然而大公物來
而順應易曰貞吉悔亡憧憧往來朋從爾思苟規規於

外誘之除將見滅於東而生於西也非惟日亦不足顧其端無窮不可得而除也人之心各有所蔽故不能適道大率患在於自私而用智自私則不能以有為為應接用智則不能以明覺為自然今以惡外物之心而求照無物之地是反鑑而索照也易曰艮其背不獲其身行其庭不見其人孟子亦曰所惡於智者為其鑿也與其非外而是內不若內外之兩忘也兩忘則澄然無事矣無事則定定則明明則睿何應物之為累哉聖人之

喜以物之當喜聖人之怒以物之當怒是聖人之喜怒
不繫於心而繫於物也是則聖人豈不應於物哉烏得
以從外者為非而更求在內者為是也今以自私用智
之喜怒而視聖人之喜怒之正為何如哉夫人之情易
發而難制者惟怒為甚第能於怒時遽亡其怒而觀理
之是非亦可以見外誘之不足惡而於道亦思過半矣
心之精微口不能宣加之素拙於文辭又吏事匆匆未
能精慮當否佇報然舉大要亦當近之矣道近求遠古

人所非惟聰明裁之

釋定性書生熟只是一義

晉城縣令書名第七

古者諸侯之國各有史故其善惡皆見乎後世自秦罷侯置守令則史亦從而廢其後自非有功德者或記之循吏與夫凶殘之極者以酷見傳其餘則泯然無聞矣如漢唐之有天下皆數百年其間郡縣之政可書宜亦多矣其見書者率纔十數人使賢者之政不幸而無傳其不肖者復幸得以蓋其惡與古史之意異矣夫圖治

於長久者雖聖賢為之且不能倉卒苟簡而就蓋必本
之人情而為之法度然後可使去惡而從善則紀綱條
教必審定而後下其民之服循漸漬亦必待久乃淳固
而不變今之為吏三歲而代者固已遲之矣使皆知禮
義者自其始至即皇皇然圖所設施則亦教令未熟民
情未孚而更書已至矣儻後之人所志不同復有甚者
欲新已之政而盡去其舊則其迹固已無餘而况因循
不職者乎噫以易息之政而又無以託其傳則宜其去

皆未幾而善惡無聞焉故欲聞古史之善而不可得則
因謂今有題前政之名氏以為記者尚為近古而斯邑
無之乃考之案牒訪之吏民纔得自李君而降二十一
人第其歲月先後而記之俾民觀其名而不忘其政後
之人得從而質其是非以為師戒云耳來者請嗣書其
次

釋縣令書名記其以天下後世懼人乎以
天下後世懼人而古史尚未復者何也

經筵劄子第一

伊川文
下同

臣伏觀自古人君守成而致盛治者莫如周成王成王

之所以成德由周公之輔養昔者周公輔

一作傅

成王幼

而習之所見必正事所聞必正言左右前後皆正人故
習與智長化與心成今士大夫家善教子弟者亦必延
名德端方之士與之居處使之薰染成性故曰少成若
天性習慣如自然伏以皇帝陛下春秋之富雖睿聖之
資得於天稟而輔養之道不可不至所謂輔養之道非
謂告詔以言過而後諫也在涵養薰陶而已大率一日
之中親賢士大夫之時多親寺人宮女之時少則自然

氣質變化德器成就欲乞朝廷慎選賢德之士以待勸講講讀既罷常留二人直日夜則一人直宿以備訪問皇帝習讀之暇游息之間時於內殿召見從容宴語不獨漸磨道義至於人情物態稼穡艱難積久自然通達比之常在深宮之中為益豈不甚大竊聞間日一開經筵講讀數行羣官列侍儼然而退情意畧不相接如此而責輔養之功不亦難乎今主上冲幼太皇太后慈愛亦未敢便乞頻出但時見講官久則自然接熟大抵與

近習處久熟則生褻慢與賢士大夫處久熟則生愛敬
此所以養成聖德為宗社生靈之福天下之事無急於
此取進止

釋以為天下之事無急於此正後世所謂迂也有志古道者其究心焉

經筵劄子第二

臣聞三代之時人君必有師傅保之官師道之教訓傳
傳其德義保保其身體後世作事無本知求治而不知
正君知規過而不知養德傳德義之道固已疎矣保身
體之法復無聞焉伏惟太皇太后陛下聰明睿哲超越

前古皇帝陛下春秋之富輔養之道當法先王臣以為
傳德義者在乎防見聞之非節嗜好之過保身體者在
乎適起居之宜存畏慎之心臣欲乞皇帝左右扶持祇
應宮人內臣並選年四十五已上厚重小心之人服用
器玩皆須質朴一應華巧奢麗之物不得至於上前要
在侈靡之物不接於目淺俗之言不入於耳及乞擇內
臣十人充經筵祇應以伺候皇帝起居凡動息必使經
筵官知之有翦桐之戲則隨事箴規違持養之方則應

時諫止調護聖躬莫過於此取進止

釋為天下生靈計
須得如此周密

慎

經筵劄子第三

臣竊以人主居崇高之位持威福之柄百官畏慎莫敢
仰視萬方承奉所欲隨得苟非知道畏義所養如此其
惑可知中常之君無不驕肆英明之主自然滿假此自
古同患治亂所繫也故周公告成王稱前王之德以寅
畏祇懼為首從古以來未有不尊賢畏相而能成其聖

者也皇帝陛下未親庶政方專問學臣以為輔養聖德
莫先寅恭動容周旋當主於此歲月積習自成聖性臣
竊聞經筵臣寮侍者皆坐而講者獨立於禮為悖欲乞
今後特令坐講不惟義理為順所以養主上尊儒重道
之心取進止

釋必如此然後能大有為
又曰如此便是大有為

上太皇太后疏第四

臣頤傾竭愚誠冒聞天聽狂妄之誅非所敢避伏念臣
草萊賤士蒙陛下拔擢置之勸講之列夙夜畢精竭慮

思所以補報萬一昨於去年六月中嘗有奏陳言輔導
人主之事已踰半年不蒙施行一事臣愚竊思所言甚
多如皆不可用其狂妄亦甚矣雖朝廷寬大不欲以言
罪人然主上春秋方富宜親有德之士豈可以狂妄之
人置之左右臣彷徨疑慮不能自己况臣所言非出己
意皆先王之法祖宗之舊不應無一事合聖心者竊疑
文字煩多陛下不能詳覽或雖蒙覽而未察愚意臣不
敢一一再言止取一事最切者復為陛下陳之臣前上

言乞於延和殿講讀太皇太后每遇政事稀簡聖體康和時至簾下觀講官進說亦省察主上進業於陛下聖聰未必無補兼講官輔導之間事意不少有當奏稟便得上聞臣今思之太皇太后雙日垂簾聽政隻日若更親臨講讀亦恐煩勞聖躬欲乞只就垂簾日聽政罷聖體不倦時召當日講官至簾前問當日主上進業次第講說所至如何開益使天下知陛下於輔養人主之道用意如此延對儒臣自古以為美事陛下試從臣言後

當知其不謬此一時之事且非定制如其無益罷之何
晚自來經筵賜坐啜茶蓋人主崇儒重道之體今太皇
太后省察主上進業雖或使之講說亦無此禮臣所以
再言此一事者蓋輔道之間有當奏知之事無由上達
若得時至簾前可以陳說所係甚大陛下必謂主上幼
冲間日讀講足矣更無他事此甚不然蓋從前不曾有
為陛下極陳輔養少主之道者故陛下未深思爾願陛
下聖明不以臣之微賤而忽其言察臣區區之心豈有

佗哉惟欲有補於人主爾臣披瀝肝膽言盡於此伏望
聖慈采納天下幸甚

釋雖於女主猶如此委曲進悟況
於長君明主哉其志忠且仁矣

開樂御宴奏狀第五

臣伏覩有司排備開樂御宴臣備員勸講職在以經義
輔導人主事有害義不敢不言夫居喪用喪禮除喪用
吉禮因事而行乃常道也今若為開樂張宴則是特為
一喜慶之事失禮意害人情無大於此雖曰故事祖宗
亦不盡行或以故而罷或因事而行臣愚竊恐祖宗之

意亦疑未安故也自古太平日久則禮樂純備蓋講求損益而漸至爾雖祖宗故事固有不可改者有當隨事損益者若以為皆不可改則是皆所未遑今不得復作前所未安後不得復正朝廷之事更無損益之理得為是乎況先朝美事亦何嘗必行臣前日所言殿上講說是也故事未安則守而不改臣前日所言冬至受表賀是也臣前後累進狂言未嘗得蒙採用而言之不已者蓋職之所當不敢曠廢伏望聖慈特賜聽納自中降旨

罷開樂宴直候因事而用於義為安冒瀆天威臣無任

釋此便見有斟酌

三代禮樂之意

顏子所好何學論第六

聖人之門其徒三千獨稱顏子為好學夫詩書六藝三千子非不習而通也然則顏子所獨好者何學也學以至聖人之道也聖人可學而至歟曰然學之道如何曰天地儲精得五行之秀者為人其本也真而靜其未發也五性具焉曰仁義禮智信形既生矣外物觸其形而

動於中矣其中動而七情出焉曰喜怒哀樂愛惡欲情
既熾而益蕩其性鑿矣是故覺者約其情使合於中正
其心養其性故曰性其情愚者則不知制之縱其情而
至於邪僻梏其性而亡之故曰情其性凡學之道正其
心養其性而已中正而誠則聖矣君子之學必先明諸
心知所養一作往然後力行以求至所謂自明而誠也故
學必盡其心盡其心則知其性知其性反而誠之聖人
也故洪範曰思曰睿睿作聖誠之道在乎信道篤信

道篤則行之果行之果則守之固仁義忠信不離乎心
造次必於是顛沛必於是出處語默必於是久而弗失
則居之安動容周旋中禮而邪僻之心無自生矣故顏
子所事則曰非禮勿視非禮勿聽非禮勿言非禮勿動
仲尼稱之則曰得一善則拳拳服膺而弗失之矣又曰
不遷怒不貳過有不善未嘗不知知之未嘗復行也此
其好之篤學之之道也視聽言動皆禮矣所異於聖人
者蓋聖人則不思而得不勉而中從容中道顏子則思

而後得必勉而後中故曰顏子之與聖人相去一息孟子曰充實而有光輝之謂大化之之謂聖聖而不可知之謂神顏子之德可謂充實而有光輝矣所未至者守之也非化之也以其好學之心假之以年則不日而化矣故仲尼曰不幸短命死矣蓋傷其不得至聖人也所謂化之者入於神而自然不思而得不勉而中之謂也孔子曰七十而從心所欲不踰矩是也或曰聖人生而知之者也今謂可學而至其有稽乎曰然孟子曰

堯舜性之也湯武反之也性之者生而知之者也反之者學而知之也又曰孔子則生而知者也孟子則學而知者也後人不達以謂聖本生知非學可至而為學之道遂失不求諸已而求諸外以博文強記巧文麗辭為工榮華其言鮮有至於道者則今之學與顏子所好異矣

釋不達怒不貳過之學分明不遠不為却他處枉日月自老朽

賑濟論第七

不制民之產無儲蓄之備飢而後發廩以食之廩有竭

而飢者不可勝濟也今不暇論其本救目前之死亡惟有節則所及者廣常見今時州縣濟飢之法或給之米豆或食之粥飯來者與之不復有辨中雖欲辨之亦不能也穀貴之時何人不願得食倉廩既竭則殍死者在目前無以救矣數年前一親戚為郡守愛恤之心可謂至矣雞鳴而起親視俵散官吏後至者必責怒之於是流民歌詠至者日衆未幾穀盡殍者滿道愚嘗憐其用心而嗤其不善處事救飢者使之免死而已非欲其豐肥

也當擇寬廣之處宿戒使晨入至巳則闔門不納午而後與之食申而出之給米者午即出日得一食則不死矣其力自能營一食者皆不來矣比之不擇而與當活數倍之多也凡濟飢當分兩處擇羸弱者作稀粥早晚兩給勿使至飽俟氣稍完然後一給第一先營寬廣居處切不得令相枕藉如作粥須官員親嘗恐生及入石灰不給浮浪無此理也平日當禁游惰至其饑餓哀矜之一也

釋賑濟論仁博而智周其王政乎

楔飲詩序第八

上已楔飲風流遠矣而蘭亭之會最為後人所稱慕者
何哉蓋其遊多豪逸之才而右軍之書復為好事者所
重耳事之顯晦未嘗不在人也潁川陳公廙始居洛則
引流回環為泛觴之所元豐己未首撰楔事公廙好古
重道所命皆儒學之士既樂嘉賓形于歌詠有不愧山
陰之句諸君屬而和者皆有高致野人程頤不能賦詩
因論今昔之異而為之評曰以我好賢方逐樂之心禮

義為踈曠之比道藝當筆劄之工誠不懼矣安知後日之視今日不若今人之慕昔人也哉

釋審若此稷飲豈止並芳於蘭亭乎

遺金閑志第九

元豐庚申歲予行至雍華間關西學者相從者六七人予以千錢掛馬鞍比就舍則亡矣僕夫曰非晨裝而亡之則涉水而墜之矣予不覺嗟曰千錢可惜坐中二人者應曰千錢失去甚可惜也次一人曰千錢微物何足為意後一人曰水中囊中可以一視人亡人得又何嘆

乎予曰人得之乃非亡也吾嘆乎有用之物若沈水中則不復為用矣至雍以語與叔曰人之器識固不同自上聖至於下愚不知有幾等同行者數人耳其不同如此也與叔曰夫數子者之言如何予曰最後者善與叔曰誠善矣然觀先生之言則見其有體而無用也予因書而志之後十五年紹聖乙亥秋九月因閱故編偶見之思與叔之不幸早死為之涕下

釋先生初嘆其意亦覺未盡

蜀守記第十

成都人稱近時鎮蜀之善者莫如田元鈞文潞公語不善必曰蔣堂程戡故謠言曰彥博虧田况程戡勝蔣堂虧猶言不如也最善之中言田更優不善之中程猶差勝也予訪之士大夫以至閭里間察其善不善之迹所謂善者得民心之悅固有可善焉所謂最不善者乃可謂最善者也至今人言及蔣公時事必有不樂之言問其所不樂者衆口所同惟三事而已減損遨樂毀后土廟及諸淫祀伐江瀆廟木修府舍也其尤失人心者節

遨樂也前蔣堂十年為政

後集 釋欲知官之賢否當視河等人稱

養魚記第十一

書齋之前有石盆池家人買魚子食貓見其煦沫也不忍因擇可生者得百餘養其中大者如指細者如箸支頤而觀之竟日始舍之洋洋然魚之得其所也終觀之戚戚焉吾之感於中也吾讀古聖人書觀古聖人之政禁數罟不入汚池魚尾不盈尺不中取市不得鬻人不
得食聖人之仁養物而不傷也如是魚之於是時其有

是困耶推是魚孰不可見耶魚乎魚乎細鉤密網吾不得禁之於彼炮燔咀嚙吾免爾於此吾知江海之大足使爾遂其性思量爾於彼而未得其路徒能以斗斛之水生爾之命生爾誠吾心爾得生已多萬類天地中吾心將奈何魚乎魚乎感吾心之戚戚者豈止魚而已乎至和甲午季夏

釋養魚記與憲前草驢
鳴意同皆可觀仁矣

謝呂晦叔待制相見書第十二

竊以古之時公卿大夫求於士故士雖自守窮閭名必

聞才必用今之時士求於公卿大夫故干進者顯榮守
道者沈晦顧處乎今之世才微學寡不敢枉道妄動雖
親戚鄉閭鮮克知其所存者矧敢期知於公卿大夫
乎伏承閣下屈近侍之尊下顧愚陋仰荷厚禮媿不足
以當之噫公卿不下士久矣顧晦於賤貧世莫之顧而
公獨降禮以就之非好賢樂善之深孰能如是乎幸甚
幸甚願閣下持是好賢之心廣求之之方盡待之之道
異日登廟堂翊明天子治以之自輔以福天下豈不厚

與鄙朴之人不善文詞姑竭其區區少致懇

釋此書豈惟見先生

之自任又以教晦叔之錫類也

答橫渠先生書第十三

累書所論病倦不能詳說試以鄙見道其畧幸不責其妄易觀吾叔之見至正而謹嚴如虛無即氣則虛無之語深探遠賸豈後世學者所嘗慮及也

然此語未能無過

餘所

論以大槩氣象言之則有苦心極力之象而無寬裕溫

厚

一作和

之氣非明睿所照而考索至此故意屢偏而言

多室小出入時有之

明所照者如目所覩纖微盡識之矣考索至者如揣料於物約見彷彿爾能

無差乎

更願完養思慮涵泳義理他日自當條暢何

日得拜見當以來書為據句句而論字字而議庶及精

微牽勉病軀不能周悉

釋此書亦禮恭言直

上富鄭公書第十四

伊川程頤齋心裁書再拜獻于致政司空相公閣下願
鄙野之人未嘗請謁有位故不獲從鄉里士子趨進門
下今者來自山中聞太皇太后厭代心誠有所迫切無

路上達敢以聞於左右蓋非公無可告者非公無肯為者願頃歲見治昭陵制度規畫一出匠者之拙謀中人之私意宰執而下受成而已莫復置思以巨木架石為之屋計不百年必當損墜既又觀陵中之物見所謂鐵罩者鐵幾萬斤以木為骨大不及三寸其相穿叩之處厚纔寸餘遠不過三二十年決須摧朽壓于梓宮于時私心惶駭不能自己使人聞於魏公魏公不以為意以魏公之忠孝於仁皇非不盡心惟其蔽於衆論昧於遠

慮以天下之力葬一人於至危之地可不痛哉陵土既復固知無可奈何然每一念之心悸魄喪或終夕不寐今鄉鄰之間有如是事可為謀而不以告人必謂之不仁況仁皇天下父母乎今也不幸太皇太后奄棄宮闈因此事會可為之謀夫合葬之禮周公已來未之有改近取諸唐帝后亦或同穴至如乾陵乃是再啟太祖皇帝神謀遠慮超越萬古昭憲太后亦合安陵稽典禮則得尊親之道徇俗法則皆享福之永此為可行無足疑

者伏願公忠誠奮發為朝廷極論其事請奉太皇太后
合祔昭陵因得徹去鐵罩用厚陵石槨之制仍更別加
裁處使異日雖木壞石墜不能為害救仁皇必至之禍
成主上莫大之孝任此事者非公孰能誠能為之天祐
忠孝必俾公熾昌壽臧子孫保無疆之休竊惟公事仁
宗皇帝三十餘年位極人臣恩遇無比料公之心苟能
使仁皇聖體保其安全雖陷一作禍患所不避也況一
言之易肯顧慮而不發乎事理至明願主上素未知爾

以公言之重竭誠致懇再三陳之不憂朝廷之不悟獨
繫公為不為爾哀誠憤激語辭鄙直內省狂易戰灼無
地不宣

釋伊川忠愛生於天
性如此富猶不及

上河東帥書第十五

願荷德既深思報宜異輒以狂言浼聞台聽公到鎮之
初必多詢訪衆人對公之語願能料之當日虜既再寇
河外必不復來公可高枕矣是常言也未知奇勝之道
兵法曰攻必取者攻其所不守也謂其不來乃其所以

來也又曰彼興大衆豈徒然哉河外空矣復來何利是大不然誠使彼得出不意破蕩數壘足以勞弊一道為利大矣何必負載而歸然後為利也竊恐謀士悅於寬憂計司幸於緩責衆論既一公雖未信而上下之心已懈矣是可慮也寧捐力於不用毋惜功而致悔莫若使彼聞嚴備而絕意則疆場安矣豈獨使敵人知有備而不來當使內地之人信可恃而願往則一二年間便可致完實長久之策也自古乘塞禦敵必用驍猛招徠撫

安多在儒將今日之事則異矣願公念之

釋籌邊無遺策矣

答人示奏草書第十六

辱示奏藁足以見仁人君子愛民之心深切如此欽服
欽服子弟當勉公以速且堅何可已也然於愚意有未
安者敢布左右觀公之意專以畏亂為主願欲公以愛
民爲先力言百姓飢且死丐朝廷哀憐因懼將爲寇亂
可也不惟告君之體當如是事勢亦宜爾公方求財以
活人所之以仁愛則當輕財而重民懼之以利害則將

恃財以自保古之時得立民則得天下財散則人聚後
世苟私利於目前以兵制民以財聚衆聚財者能守保
民者爲迂秦漢而下莫不然也竊慮廟堂諸賢未能免
此惟當以誠意感動觀其有不忍之心而已淺見無取
惟公裁之

釋謀人之忠告
君之體可兼觀

答朱長文書第十七

相去之遠未知何日復為會合人事自難前期也中前
奉書以足下心虛氣損奉勸勿多作詩文而見答之辭

乃曰為學上能探古先之陳迹綜羣言之是非欲其心
通而默識之固未能也又曰使後人見之猶庶幾曰不
忘乎善也苟不能如是誠懼沒而無聞焉此為學之末
宜兄之見責也使吾日聞夫子之道而忘乎此豈不善
哉

恐不記書中之
言故却錄去

此疑未得為至當之言也某於朋友

間其問不切者未嘗敢語也以足下處疾罕與人接渴
聞議論之益故因此可論而為吾弟盡其說庶幾有小
補也向之云無多為文與詩者非止為傷心氣也直以

不當輕作爾聖賢之言不得已也蓋有是言則是理明
無是言則天下之理有闕焉如彼耒耜陶冶之器一不
制則生人之道有不足矣聖賢之言雖欲已得乎然其
包涵盡天下之理亦甚約也後之人始執卷則以文章
為先平生所為動多於聖人然有之無所補無之靡所
闕乃無用之贅言也不止贅而已既不得其要則離真
失正反害於道必矣詩之盛莫如唐唐人善論文莫如
韓愈愈之所稱獨高李杜二子之詩存者千篇皆吾弟

所見也可考而知矣苟足下所作皆合於道足以輔翼
聖人為教於後乃聖賢事業何得為學之末乎某何敢
以此奉責又言欲使後人見其不忘乎善人能為合道
之文者知道者也在知道者所以為文之心乃非區區
懼其無聞于後欲使後人見其不忘乎善而已此乃世
人之私心也夫子疾沒世而名不稱焉者疾沒身無善
可稱云爾非謂疾無名也名者可以厲中人君子所存
非所汲汲又云上能探古先之陳迹綜羣言之是非欲

其心通默識固未能也夫心通乎道然後能辯是非如
持權衡以較輕重孟子所謂知言是也揆之以道則是
非了然不待精思而後見也學者當以道為本心不通
於道而較古人之是非猶不持權衡而酌輕重竭其目
力勞其心志雖使時中亦古人所謂億則屢中君子不
貴也臨紙遽書不復思繹故言無次序多注改勿訝辭
過煩矣理或未安却請示下足以代面話

釋讀此書而
尤馳心空辭

者非志
士也

答呂大臨書第十八

先生曰中即道也若謂道出於中則道在中內別為一物矣所謂論其所同不容更有二名別而言之亦不可混為一事此語固無病若謂性與天道大本與達道可混而為一即未安在天曰命在人曰性循性曰道性也命也道也各有所當大本言其體達道言其用體用自殊安得不為二乎

答楊時論西銘書第十九

前所寄史論十篇其意甚正纔一觀便為人借去俟更
子細看西銘之論則未然橫渠立言誠有過者乃在正
蒙西銘之為書推理以存義擴前聖所未發與孟子性
善養氣之論同功

二者亦前
聖所未發

豈墨氏之比哉西銘明理

一而分殊墨氏則二本而無分

老幼及人理一也
愛無差等本二也

分殊

之蔽私勝而失仁無分之罪兼愛而無義分立而推理
一以止私勝之流仁之方也無別而迷兼愛至於無父
之極義之賊也子比而同之過矣若謂言體而不及用

彼欲使人推而行之本為用也反謂不及不亦異乎

釋據

此則龜山似以體用為二尚在文字上泥乎

答張閔中書第二十

易傳未傳自量精力未衰尚覬有少進爾然亦不必直待身後覺耄則傳矣書雖未出學未嘗不傳也第患無受之者爾來書云易之義本起於數謂義起於數則非也有理而後有象有象而後有數易因象以明理由象而知數得其義則象數在其中矣必欲窮象之隱微盡

數之毫忽乃尋流逐末術家之所尚非儒者之所務也

管輅郭璞之徒是已

釋易是人事在粗顯處求便易得

葬說第二十一

卜其宅兆卜其地之美惡也非陰陽家所謂禍福者也

地之美者則其神靈安其子孫盛若培壠其根而枝葉

茂理固然矣地之惡者則反是然則曷謂地之美者土

色之光潤

一作澤

草木之茂盛乃其驗也父祖子孫同氣

彼安則此安彼危則此危亦其理也而拘忌者惑以擇

地之方位決日之吉凶不亦泥乎甚者不以奉先為計而專以利後為慮尤非孝子安厝之用心也惟五患者不得不慎須使異日不為道路不為城郭不為溝池不為貴勢所奪不為耕犁所及

一本所謂五患者溝渠道名避村落遠井霍

五

患既慎則又鑿地必至四五丈過石必更穿之防水潤也既葬則以松脂塗棺槨石灰封墓門此其大畧也若夫精畫則又在審思慮矣其火葬

一作焚

者出不得已後

不可遷就同葬

一作焚

矣至於年紀寢遠曾高不辨亦在

盡誠各具棺槨葬之不須假夢寐著龜而決也葬之穴尊者居中左昭右穆而次後則或東或西亦左右相對而啟穴也出母不合葬亦不合祭棄女還家以殤穴葬

之釋此葬事之準繩規矩

祭禮第二十二

凡祭洒掃廳事設几案於階下設盥盆帨手巾祭前一
日視滌濯五更起安排如法具時果並菜三飣或五飣
盞盤匙筯訖次設香卓次設盥盆茅縮更祭服焚香請

曰孝孫某今以仲春之祭共請太祖某官高祖某官曾祖某官祖某官考某官降赴神位奠酒焚香跪執事者過酒左手把盤右手以酒澆醑於灌盆茅縮處俛伏再拜興左避位遂行獻執事者注酒下食二味或一味隨人家貧富項之再拜亞獻如前三獻如前事畢焚香曰祭祀已畢揖執事徹饌祭祖妣亦如前式

釋此禮近人情雖庶人可

通行

與方元寀手帖第二十三

聖人之道坦如大路學者病不得其門耳得其門無遠之不可到也求入其門不由于經乎今之治經者亦衆矣然而買櫝還珠之弊人人皆是經所以載道也誦其言辭解其訓詁而不及道乃無用之糟粕耳觀足下由經以求道勉之又勉異日見卓爾有立於前然後不知手之舞足之蹈不加勉而不能自止矣

按朱子跋此帖有二其一有應

舉耕田之語又嘗得先生年二十五時帖惜皆不可見姑記朱說云釋只要人實學耳

伊川

論

傳聞續記第二十四

釋續紀數事
亦自闕切

神宗欲用溫公召知許州令過闕上殿方下詔謂監察御史裏行程顥曰朕召司馬光卿度來否顥對曰陛下能用其言光必來不能用其言光必不來帝曰未論用其言如光者常在左右人主自可無過公果辭召命同陳左司瓘曰范公淳夫嘗論顥子不遷怒不貳過惟伯淳能之予問公曰伯淳誰也公默然久之曰不知有程伯淳耶予謝曰生長東南實未知也予常以寡陋自媿

了翁之子正由云了翁自是每得明道先生之文必冠

帶然後讀之

范太史遺事

曹彬攻金陵垂克忽稱疾不視事諸將皆來問疾彬曰
余之病非藥石所愈惟須諸公共發誠心自誓以克城
之日不妄殺一人則自愈矣諸將許諾共焚香為誓明
日稍愈及克金陵城中皆安堵如故曹翰克江州忿其
久不下屠戮無遺彬之子孫貴盛至今不絕翰卒不三
十年子孫有乞丐於海上者矣程頤云

涑水記聞

或問伊川量可學否曰可學進則識進識進則量進曰

如魏公可學否曰魏公是間氣

胡本傳家錄

伊川又同張子堅來方春時先君率同遊天門街看花
伊川辭曰平生未嘗看花先君曰庸何傷乎物物皆有
至理吾儕看花異於常人自可以觀造化之妙伊川曰
如是則願從先生遊

同上

先君病且革伊川曰先生至此他人無以致力願先生
自主張先君曰平生學道固如此矣然亦無可主張伊

川猶且問難不已先君戲之曰正叔可謂生薑樹頭生
必是生薑樹頭死也伊川曰從此與先生永訣矣更有
可以見告者乎先君聲氣已微舉張兩手以示之伊川
曰何謂也先君曰面前路徑須常令寬路徑窄則自無
著身處况能使人行也

同上

二程子抄釋卷九

欽定四庫全書

二程子抄釋卷十

明 呂柟 編

五七言詩律第二十五

釋律詩於和風甘雨中求之則得

仙掌遠相招縈紆渡石橋暝雲生澗底寒雨下山腰樹
色千層亂天形一罅遙吏紛難久駐回首羨漁樵

遊紫閣山

人生百年永光景我逾半中間幾悲歡况復多聚散青
陽變晚春弱條成老幹不為時節驚把酒欲誰勸

晚春

雲靜好風微清光溢四垂金行方盛日陰魄正中時

鬢窺瑤闕分明露桂枝遶英同醉賞誰復嘆官羈

中秋月

得意即為適種花非貴多一區才丈席滿目自雲蘿靜

聽禽聲樂閒招月色過期公在康濟終奈此情何

和花庵

治劇君能佚居閒我愛慵自惟降藻麗不解繼春容
寡和知高唱深情見古風靜吟梁甫意真似卧隆中

庭下竹青青盆荷水面平誰言無遠趣自覺有餘清影

倒假山翠波光朝日明漣漪尤綠淨涼吹夜來生

盆荷

盛集蘭亭舊風流洛社今坐中無俗客水曲有清音香篆來還去花枝泛復沈未須愁日暮天際是輕陰

陳公廙園

修禊事

轟雷疊鼓響前峯來自彤雲翠靄中洞壑積陰成氣象鬼神憑暗弄威風噴崖雨露千尋濕落石珠璣萬顆紅縱有虬龍難駐足還應不是旱時功

高觀谷

長嘯巖東古寺前三峯相倚勢相連偶逢雲靜得見日若有路通須近天陰吹響雷生谷底老松如箸見崖顛

結根不得居平地猶與蓮花遠比肩

凌霄三峯

仙人紺髮粉紅腮近自武陵源上來

此花近歲方有

不比常花

羞晚發故將春色待秋開存留金藥天偏與漏泄春香

衆始猜兼得佳名共堅節曉霜還獨對樓臺

桃花

一夜威霜特地嚴朝來寒氣入書簾乍須火暖親爐獸

初覺冰漸結硯蟾敗葉卷風輕藪藪遠峯經燒靜尖尖

出門未要貂狐燠且著輕裘次第添

早寒

青帝方成萬物春如何淫雨害芳晨乞求共指雲間日

悔恨輕嫌陌上塵消盡風威猶料峭放閒春色已嶙峋
燕遊莫道王孫樂亦有羲皇更上人

新晴
野步

溪水橋邊鴨子陂樓臺只在郡城西烟波乍見心先快
島嶼將尋路欲迷盡日無風橫舴艋有時經雨飲虹霓
如何咫尺塵埃地能使遊人意不齊

西湖

城居不見萬山重因起高亭破遠空虛曠直疑天宇外
周旋如在畫屏中凝風散靄層層出削玉排青面面同
暫得登臨已忘去四時佳致屬賢公

環翠
亭

大都博奕皆戲劇象戲翻能學用兵車馬尚存周戰法
偏裨兼備漢官名中軍八面將軍重河外尖斜步卒輕
却凭紋楸聊自笑雄如劉項亦閒爭

象戲

滿地清霜結曉寒平明飛霰洒柴關乍憑酒力溫肌骨
陡覺風威著面顏閭里相呼泥北戶牛羊收牧下前山
急須趁日藏薪炭凍後高枝不易攀

和家君早
寒之什

漸覺東皇意思勻陳根初動夜來新忽驚平地有輕綠
已蓋六街無舊塵莫為枯榮吟野草且憐愁醉祝香輪

詩人空怨王孫遠極目萋萋又一春

和詠草

打乖非是要安身道大方能混世塵陋巷一生顏氏樂
清風千古伯夷貧客求墨妙多攜卷天為詩豪剩借春
儘把笑懽親俗子德容猶足慰鄉人

和邵堯夫打乖吟

聖賢事業本經綸肯為巢由繼後塵三幣未回伊尹志
萬鍾難換子輿貧且因經世藏千古已占西軒度十春
時止時行皆有命先生不是打乖人

先生非是愛吟詩為要形容至樂時醉裏乾坤都寓物

閒來風月更輸誰
死生有命人何與
消長隨時我不悲
直到希夷無事處
先生非是愛吟詩

和堯夫
首尾吟

先生相與賞西街
小子親持几杖來
行次每容參極論
坐隅還許侍餘盃
檻前流水心同樂
林外青山眼重開
時泰身閒兩難得
直須乘興數追陪

和堯夫西
街之什

先生高蹈隱西街
風月猶牽賦詠才
暫到鄰家賞池館
便將佳句寫瓊瑰
仕圖已讓心先快
劇韻仍降字占闕
只有一條誇大甚
水邊曾未兩三盃

月陂堤上肆徘徊北有中天百尺臺萬物已隨秋氣改
一罇聊為晚涼開水心雲影閒相照林下泉聲靜自來
世事無端何足計但逢佳日約重陪

亦和堯夫
遊月陂

寥寥天氣已高秋更倚凌虛百尺樓世上利名羣蟻蠅
古來興廢幾浮漚退居陋巷顏回樂不見長安李白愁
兩事到頭須有得我心處處自優游

秋日
偶成

閒來無事不從容睡覺東窗日已紅萬物靜觀皆自得
四時佳興與人同道通天地有形外思入風雲變態中

金
富貴不淫貧賤樂男兒到此是英雄

閒坊西曲奉常家景物天然占一窠恰似庾園基址小
全勝浥澗路途賒知他陋巷心猶樂比我僑居事已誇

且喜杖藜相過易隔牆無用少游車

和王
安之

芳原綠野恣行時春入遙山碧四圍興逐亂紅穿柳巷
困臨溪水坐苔磯莫辭盞酒十分醉祇恐風花一片飛

況是清明好天氣不妨游行莫忘歸

郊行
即事

新蒲嫩柳滿汀洲春入漁舟一棹浮雲幕倒遮天外日

風帘輕颺竹間樓望窮遠岫微茫見興逐歸槎汗漫遊

不畏蛟螭起波浪却憐清泚向東流

春日江上

驟經微雨過芳郊轉覺長河氣象豪歸騎已登吳坂峻
飛雲猶認華山高門前岐路通西國城上樓臺壓巨濤

欲問甘棠舊風化主人邀客醉香醪

下白徑嶺先寄孔周翰郎中

衡茅岑寂掩柴關庭下蕭疎竹數竿狹地難容大池沼
淺盆聊作小波瀾澄澄皓月供宵影瑟瑟涼風動曉寒
不校蹄涔與滄海未知清興有誰安

盆荷

歎息斯文約共修如何夫子便長休東山無復蒼生望
西土誰供後學求千古聲名聯棣萼二年零落去山邱
寢門慟哭知何限豈獨交親念舊游

哭張子厚先生

陰曠消除六幕寬嬉遊何事我心閒鳥聲人意融和候
草色花香藹間水底斷霞光出岸雲頭斜日影銜山
緣情若論詩家興却恐騷人合厚顏

新晴野望

詩絕句第二十六

釋絕句於清風明月下求之即飄然也

雲淡風輕近午天傍花隨柳過前川時人不識予心樂

將謂偷閒學少年

偶成

吏身拘絆同疏屬俗眼塵昏甚瞽瞍辜負終南好泉石

一年一度到山中

白雲道中

身勞無補公家事心冗空令學業衰世路嶮巇功業遠

未能歸去不男兒

馬上偶成

參差臺殿綠雲中四面簷簷一徑通曾讀華陽真誥上

神仙居在碧琳宮

草堂

車倦人煩渴思長巖中冰片玉成方老仙笑我塵勞久

乞與雲膏洗俗腸

長行暑中得水
以石敲食甚佳

久厭塵籠萬慮昏喜尋泉石暫清神目勞足倦深山裏

猶勝低眉對俗人

游重
雲

南藥東邊白閣西登臨身共白雲齊上方頂上朝來望

陡覺羣峯四面低

雲際
山

襟裾三日絕塵埃欲上籃輿首重迴不是吾儒本經濟

等閒爭肯出山來

下山
偶成

中春時節百花明何必繁絃列管聲借問近郊行樂地

潢溪山水照人清

心門不為管絃樂道勝豈因名利榮莫謂冗官難自適
暇時還得肆遊行

功名不是關心事富貴由來自有天任是權酷虧課利
不過抽得俸中錢

有生得遇唐虞聖為政仍逢守令賢縱得無能閒主簿
嬉遊不負艷陽天

獄訟已聞冤滯雪田農還喜土膏勻只應野叟猶相笑

不與溪山作主人

以上亦遊山作得小松黃楊四本植公署詩呈張寺丞興宗

須知春色醲於酒醉得遊人意自狂直使華顛老公子

看花爭入少年場

貪花自是少年事泥酒定嫌醒者非顧我疎慵老山野

却騎歸馬背斜暉

下馬問老僕言公賞花去只在近園中叢深不知處

桃李飄零杏子青滿城車馬鄉音春寔就中得意張公子

十日花前醉不醒

以上九日訪張子直承出看花不過戲書學舍

妖言莫信傳張惡虛氣休將碎唾壺借問閑窗靜孤背

何如爭勝擊珊瑚

贈王求甫
鐵如意

曉日都門颭旆旌曉風鏡吹入三城知公再為蒼生起

不是尋常刺史行

送呂晦叔
赴河陽

二龍閑卧洛波清今日都門獨餞行願得賢人均出處

始知深意在蒼生

贈司馬
君實

曾是去年賞春日春光過了只逡巡却是去年春自去

我心依舊去年春

戲題

南去北來休便休
白蘋吹盡楚江秋
道人不是悲秋客

一任晚山相對愁

題淮
南寺

誰憐大地多奇景
自愛貧家有古風
會向紅塵生野思

始知泉石在胸中

野
軒

強潔猶來真為好
高安得是無心汗
亭妙旨君須會

物我何爭事莫侵

汗
亭

囊中數味應千種
砌下栽苗過百名
好是無風入庭戶

清香交送滿檐楹

藥
軒

亭下花光春正好亭頭山色晚尤佳欲知剩占春風處

思順街東第一家

晚暉亭

急須乘興賞春英莫待空枝謾寄聲淑景暖風前日事

淡雲微雨此時情

和諸公
梅臺

常勸嬉遊須及辰莫辭巾屨染埃塵祇應風雨梅臺上

已減前時一半春

後一日
再和

鞭羸百里遠來遊數日陰雲暝不收遮斷好山教不去


如何天意異人謀

伊川遊嵩
山下首同

至誠通聖藥通神遠寄衰翁濟病身我亦有丹君信否

用時還解壽斯民

謝王佺
期寄藥



二程子抄釋卷十